

Deklarasi Rakyat berkembang jadi 'Selamatkan Malaysia', sasar 1 juta nama
Malaysian Insider
March 10, 2016
Oleh Zulkifli Sulong

Kumpulan yang menandatangani Deklarasi Rakyat pada Jumaat lalu mendesak Datuk Seri Najib Razak berundur mencapai kata sepakat malam tadi untuk menubuhkan satu badan yang dinamakan Gerakan Selamatkan Malaysia pimpinan Tun Dr Mahathir Mohamad.

Salah seorang sumber yang menghadiri mesyuarat itu berkata, pergerakan itu kini menyasarkan sejuta orang untuk menandatangani akuan menuntut peletakan jawatan Najib.

Sumber yang menghadiri mesyuarat malam tadi memberitahu The Malaysian Insider, pergerakan itu juga akan membuka pejabat di peringkat negeri.

Hampir semua 45 penandatanganan deklarasi itu menyertai majlis diuruskan pejabat Tun Dr Mahathir Mohamad itu kecuali Presiden Amanah Mohamad Sabu yang berada di Sarawak dan Tan Sri Muhyidin Yassin yang kurang sihat.

"Membuatkan gerakan ini berstruktur adalah satu kejayaan besar kerana ia menghimpunkan pelbagai pihak daripada pelbagai latar belakang untuk duduk bersama bagi mencapai tujuan yang sama," kata sumber yang enggan dikenali itu.

Sumber berkata, pada prinsipnya Tun Dr Mahathir adalah ketua gerakan ini namun ia belum dibincangkan secara rasmi lagi.

"Kami akan bincangkan ini di peringkat sekretariat yang ditubuhkan agar satu Majlis Pimpinan ditubuhkan dengan Tun sebagai pemimpinnya," katanya.

Pertemuan malam tadi bersetuju memilih Datuk Zaid Ibrahim, Maria Chin Abdullah daripada Bersih dan Datuk Mahfuz Omar sebagai 3 nama awal sekretariat itu dan akan ditambah lagi selepas ini.

Selain Dr Mahathir, turut memberikan pandangan malam tadi ialah Datuk Husam Musa yang melancarkan gerakan Selamatkan Malaysia buat pertama kali di Kulai, Johor.

Antara yang memberikan pandangan dalam majlis pada malam tadi ialah bekas presiden MCA Tun Ling Leong Sik, Ketua Parlimen DAP Lim Kit Siang, bekas presiden Majlis Peguam Datuk Ambiga Srevanasan, Ahli Parlimen Batu Tian Chua, bekas setiausaha agung Umno Tan Sri Sanusi Junid, Adun Batu Burok Dr Syed Azman Ahmad Nawawi, Cynthia Gabriel daripada C4, Abdullah Sani daripada MTUC, Datuk Seri Lajim Ukin dan Ahli Parlimen Bukit Katil Samsul Iskandar Mat Akin

Mereka bersetuju akan mengadakan majlis penerangan di semua negeri selain mengumpulkan tandatangan menyokong Deklarasi Selamatkan Malaysia dengan menyasarkan sejuta penandatangan. – 10 Mac, 2016.

Copyright © 2015 Edge Insider Sdn Bhd

Source:

<http://www.themalaysianoutsider.com/bahasa/article/deklarasi-rakyat-berkembang-jadi-selamatkan-malaysia-sasar-1-juta-nama>